

**ՊԱՅԾԱՌ ԱՆՀԱՏԱԿԱՆՈՒԹՅՈՒՆ ՄԸ
ՏՈՔԹՈՐ ՎԻԳԷՆ ՃԻԶՄԷՃԵԱՆ**



(1961-2022)

Ատենապետ ՀԲԸՄԻ Գահիրէի Մասնաճիւղին

Խմբագիր՝ Մարուշ Երամեան
Էջադրում՝ Շահէ Լուսարարեան
Տպագրութիւն՝ Nubar Digital



ԴԻԴԱՆ

ԳԱՀԻՐԷԻ ԱԶԳԱՅԻՆ ԱՌԱՋՆՈՐԴԱՐԱՆԻ

ՄԱՅ ԱՁ Դ

Եզիպտոսի Հայոց Թեմի Ազգային Առաջնորդարանը կը գումծ
Գահիրէի Պատկ. Թեմական Ժողովի նախկին անդամ եւ
համայնքիս մէջ բազմամեայ վաստակ ունեցող

ՏՈՔԹ. ՎԻԳԷՆ ՃԻԶՄԷՃԵԱՆԻ

անժամանակ մահը:

Ազգային յուղարկաւորութիւնը տեղի պիտի ունենայ

Ուրբաթ, 29 Յուլիս 2022-ին, Ժամը 1:00-ին,

Ս. Գրիգոր Լուսաւորիչ եկեղեցոյ մէջ,

Ապա հանգուցեալին մարմինը պիտի փոխադրուի եւ ամփոփուի
Հելիոպոլսոյ Ամենայն Սրբոց Ազգային Գերեզմանատան ընտանեկան
դամբարանին մէջ:

Ընտանիքը ցաւակցութիւնները պիտի ընդունի

Շաբաթ, 30 Յուլիսին, կէսօրէ ետք ժամը 6.00-էն սկսեալ,

Ազգային Առաջնորդարանի դահլիճին մէջ:

Այս տխուր առիթով Եզիպտոսի Հայոց Թեմի հոգեւոր դասի, Գահիրէի
եւ Աղեքսանդրիոյ Ազգային իշխանութիւններու եւ յարակից
մարմիններու անունով խորազգաց ցաւակցութիւններ կը յայտնենք
հանգուցեալի ընտանիքին, հարազատներուն, բարեկամներուն ու
միութենական ընկերներուն:

Խունկ, աղօթք

եւ բիւր օրհնութիւն հանգուցեալի հոգւոյն

ՓՈԽԱՆ ՅԱՌԱՋԱԲԱՆԻ

Բոլորիս սուգը մեծ է եւ ցաւը խորունկ, երբ այսօր եկած ենք յարգանքի մեր վերջին տուրքը մատուցելու ՀԲԸՄիութեան սիրւած եւ կարկառուն անդամներէն մէկուն անժամանակ մահուան համար:

Կարելի չէ խօսքերով նկարագրել եւ սպառել անհատականութիւնը տոքթ. Վիգէն Ճիզմէճեանի, անձ մը, որուն ներկայութիւնը կը լեցնէր գաղութին կեանքը, միութենական թէ մարզական ասպարէզներու մէջ:

Մանկութենէն, հակառակ իր հանդարտաբարոյ նկարագրին, եռանդուն եղած է միշտ եւ փայլուն, ոչ միայն դպրոցական եւ համալսարանական ուսման, այլ նաեւ միութենական կեանքին մէջ:

Պատասխանատւութեան գիտակցութիւնը զինք առաջնորդած է իր անսակարկ նուիրումը բերելու Հայկական Բարեգործական Ընդհանուր Միութեան, երբ տասը երկար տարիներ օժանդակած է անոր աշխատանքներուն, առանց պաշտօնական որեւէ պիտակի, որմէ ետք անմիջապէս Գահիրէի մասնաճիւղին ատենապետ կարգուած է, իր համակարգուած մտածողութեան եւ աշխատանքին համար:

Նախակրթական ուսումը Հելիոպոլսոյ Նուպարեան Ազգային վարժարանին մէջ ստանալէ ետք, յաճախած է Յիսուսեան երկրորդականը եւ վկայուած Գահիրէի Համալսարանէն, որպէս ատամնաբոյժ-վիրաբոյժ:

Եղած է հաղորդակցութեանց տնօրէն եւ պաշտօնական բանբեր ֆուբպոլի Ափրիկեան ֆետերասիոնին, անդամ ՖԻՖԱյի աշխարհի մրցումները կազմակերպող յանձնախումբին, եղած է տեղեկատուութեանց պատասխանատու աշխարհի ախոյեանութեան մրցումներուն, պաշտօնական լրատու եւ ծրագրումի տնօրէն ափրիկեան ֆուբպոլի ախոյեանութեան, Եգիպտոս, անդամ ՖԻՖԱյի լրատուութեան յանձնախումբին, անդամ Եգիպտոսի ֆուբպոլի միութեան գործադիր յանձնաժողովին, ՖԻՖԱյի լրատութեան պատասխանատու աշխարհի ախոյեանութեան մրցաշարքին, Գանատա, ՖԻՖԱյի պատուիրակ ֆուբպոլի միջազգային մրցումներուն, ծրագրումի տնօրէն ՖԻՖԱյի աշխարհի ախոյեանութեան երիտասարդաց մրցումներուն, Եգիպտոս:

Եգիպտահայ համայնքէն ներս ունեցած է ծաւալուն գործունէութիւն՝

Եղած է անդամ Գահիրէի ՀԲԸՄի Կռունկ երգչախումբին, օժանդակ անդամ Գահիրէի ՀՄԸՄ-ՆՈՒՊԱՐի երիտասարդաց վարչութեան, խմբապետ ՀՄԸՄ-ՆՈՒՊԱՐի սկաուտական շարժումին, անդամ, ապա ատենապետ Գահիրէի ՀՄԸՄ-ՆՈՒՊԱՐի երիտասարդաց յանձնախումբին, անդամ Գահիրէի Սուրբ Գրիգոր Լուսաւորիչ եկեղեցւոյ հոգաբարձութեան, վարչութեան անդամ Գահիրէի ՀՄԸՄ-ՆՈՒՊԱՐ մարզական ակումբին, անդամ Գահիրէի Թեմական ժողովին, օժանդակ անդամ Գահիրէի ՀԲԸՄի վարչութեան,

Խմբագիր Եգիպտոսի ՀԲԸՄի կայքէջին, խմբագրական խորհրդատու ՀԲԸՄի «Տեղեկատու» հանդէսին, անդամ ՀԲԸՄի Եգիպտոսի Շրջանակային Յանձնաժողովին, ապա՝ փոխ-ատենապետ եւ մինչեւ օրս՝ ատենապետ ՀԲԸՄի Գահիրէի մասնաճիւղին:

Տակաւին այնքան բան ունէր տալիք իր եռանդէն եւ աշխատանքէն Եգիպտահայ գաղութին թէ իր ծննդավայր երկրին՝ Եգիպտոսի: Նման հարուստ կեանքի մը այսպէս բրտօրէն դադարումը մեզ խորունկ ցաւով կը լեցնէ, ինչպէս եւ կ'ափսոսանք մեր համայնքի գալիք սերունդներուն, որոնք ա՛լ առիթը պիտի չունենան հանդիպելու տղթոր Վիգէն Ճիզմէճեանին, ծանօթանալու անոր եւ վայելելու իր մարդկային մեծարժէք յատկութիւնները:

ՀԲԸՄի Շրջանակային Յանձնաժողովին եւ Գահիրէի Մասնաճիւղին անունով Աստուծոյ մխիթարութիւնը կը հայցենք իր մօր, տիկնոջ, դուստրերուն, ընտանիքին բոլոր անդամներուն, ինչպէս եւ մեր համայնքի իւրաքանչիւր զաւկին համար:

Լոյսերու մէջ հանգչի իր գեղեցիկ հոգին:

***ՀԲԸՄի Եգիպտոսի Շրջանակին խօսքը
Տոոքթ. Վիգէն Ճիզմէճեանի յուղարկաւորութեան***

**Պատրիարքարան Աղեքսանդրիոյ
Կաթողիկէ Հայոց**

**Patriarcat Armenien
Catholique d’Alexandrie**

Կը ցաւակցինք հանգուցեալ տոքթ. Վիգէն Ճիզմէճեանի
ընտանիքին, հարազատներուն եւ բարեկամներուն:

Աստուած հոգին լուսաւորէ: Խունկ եւ մոմ իր անթառամ
յիշատակին:

Յիշատակն արդարոց օրհնութեամբ եղիցի:

Հայր Գրիգոր Օգոստինոս Եպս. Գուսան
Առաջնորդ Աղեքսանդրիոյ Կաթողիկէ Հայոց



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԴԵՍՊՊԱՆ - ԿԱՀԻՐԵ
AMBASSADOR OF THE REPUBLIC OF ARMENIA - CAIRO

No. 03/268

Կահիրե, 28-ը հուլիսի, 2022թ.

Սիրելի Տիկին Ալին Ճիզմեճյան

Ճիզմեճյան և Պըլլքտանյան Ընտանիք,

Սրտի խորը կսկիծով տեղեկացանք Կահիրեի ՀԲԸՄ-ի ատենապետ
Դոկտ. Վիզեն Ճիզմեճյանի մահվան տխուր լուրի մասին:

Պարոն Ճիզմեճյանը տարիներ շարունակ եղել է անձնանվեր իր
գործունեության մեջ: Նրա հիշատակը միշտ վառ կմնա այն մարդկանց
սրտերում, ում բախտ է վիճակվել վայելել պարոն Ճիզմեճյանի մտերմությունը:

Հայաստանի դեսպանության ողջ անձնակազմի և անձամբ իմ անունից
խորին վշտակցություններ եմ հայտնում ձեզ, մաղթում եմ ուժ, կորով և
համբերություն:

Հրաչյա ՓՈԼԱԴՅԱՆ

28 Յուլիս 2022

Տիկին Ալին Ճիգմեճեան
Գահիրէ, Եգիպտոս

Ազնիւ Տիկին Ճիգմեճեան,

Հայկական Բարեգործական Ընդհանուր Միութեան ընտանիքին համար, նաեւ մեզի համար անձնապէս, ձեր սիրելի ամուսնոյն Վիգէնին անժամանակ մահը, խոր վիշտ եւ ցաւ կը պատճառէ, ոչ միայն սիրելի անձի մը, ազնուական բնաւորութեամբ բարեկամի մը, մարդասէր եւ ծառայասէր ազգայինի մը մեկնումով, այլեւ Եգիպտոսի մեր պատմական համայնքին համար, ազգային, քաղաքական, համայնքային եւ երիտասարդական շարժումներու առաջնորդ, ժրագն, բազմակողմանի արժանիքներով օժտուած օրինակելի ղեկավարի մը վաղահաս շիջումով:

Մարդկայնօրէն դժուար է անշուշտ հաշտուիլ դառն իրականութեան հետ, երբ կենսախինդ, գուարթախոհ, յուսալի ու խանդավար միութենական գործակից մը, գործիչ մը, որուն հետ բազմաթիւ եւ յաճախակի հանդիպումներու եւ համագործակցութեան տարբեր առիթներով, տակաւին վերջերս Լիբանանի մէջ, յիշատակելի պահեր ապրած ենք, մտահոգութիւններ բաժնած ենք եւ ապագայի յոյսեր փայփայած ենք, անսպասելիօրէն կը հեռանայ կեանքէն, վշտահար սիրելիներ, հարազատներ եւ բարեկամներ ձգելով իր ետին:

Եգիպտոսի մեր շրջանակը, ազգային թեմական մարմինները եւ Եգիպտոսի բժշկական, երիտասարդական, մարզական եւ լրատուական լայն համայնքը ընդհանրապէս, անկասկած մեծ բացի մը զգացողութիւնը կ'ապրին այսօր, Վիգէնին մեկնումով: Բայց եւ այնպէս, երբ կ'անդրադարձանք այն փայլուն դրոշմին, որ ան կը ձգէ իր օրինակելի վարքագիծով դաստիարակուած երիտասարդութեան եւ միութենանուէր գործունէութեան ազդեցութեամբ ծառայասիրութեան մղուած անդամներու մեծ թիւով, կը գիտակցինք, թէ ան կը շարունակէ ապրիլ իր պայծառ յիշատակներով, լատենտութիւն եւ յարատեւելու ոգի ներշնչելով զինք սիրողներու եւ յարգողներու խիտ շարքերուն:

Այս տխուր առիթով, Հայկական Բարեգործական Ընդհանուր Միութեան անունով եւ անձնապէս, մեր խորագգաց ցաւակցութիւնները կը փոխանցենք ձեզի, ձեր դուստրերուն՝ Ասրէլին եւ Մանէին, ինչպէս նաեւ ձեր ընտանիքին, հարազատներուն եւ սիրելիներուն: Աստուած լուսաւորէ Վիգէնի ազնիւ հոգին եւ օրհնեալ ըլլայ իր անթառամ յիշատակը:

Վշտակցութեամբ՝



Պերճ Սեդրակեան
Նախագահ

Երեւան, 28 Յուլիս 2022

Հ.Բ.Ը. Միութեան Եգիպտոսի Շրջանակային Յանձնաժողով,

Հ.Բ.Ը. Միութեան Գահիրէի Մասնաճիւղ,

Սիրելի Միութենականներ եւ բարեկամներ,

Խորունկ ցաւով եւ կսկիծով իմացանք Եգիպտահայ գաղութի երեւելի դէմքերէն եւ Հ.Բ.Ը.Մ.ի Եգիպտոսի Շրջանակի ղեկավարներէն մեր սիրելի գործակից Տոքթ. Վիգէն Ճիզմէճեանի անժամանակ մահուան գոյժը:

Արդարեւ, ընդհանրապէս Եգիպտահայութեան ազգային կեանքէն եւ մասնաւորապէս մեր Միութեան կառոյցներէն ներս վերջին տասնամեակներուն տիրական ներկայութիւն ունեցած եւ նուիրեալ ու աշխոյժ գործունէութիւն ծաւալած Տոքթ.ին ծանր եւ անդառնալի կորուստը ցնցած է բոլորս: Հանգուցեալը օժտուած էր ծառայական ոգիով, լաւատեսութեամբ եւ կենսախիւնը բնաւորութեամբ՝ միշտ պատրաստ իրագործելու ազգօգուտ նոր ծրագիրներ, խանդավառութիւն ստեղծելով նաեւ իր շուրջը:

Խորապէս սգալով Տոքթ. Վիգէն Ճիզմէճեանի դառնաղետ կորուստը, յանուն Հայաստանի Հ.Բ.Ը.Մ.ի, եւ անձամբ իմ կողմէ, խորազգաց ցաւակցութիւններ եւ հանգուցեալին բարի յիշատակներովը ապրելու մխիթարանքի խօսքեր կը յղենք Ճիզմէճեան ընտանիքի անդամներուն, հարազատներուն, բարեկամներուն, ինչպէս նաեւ Հ.Բ.Ը.Մ.ի Եգիպտոսի Շրջանակին:

Սիրելի Տոքթ.ին յիշատակը միշտ վառ պիտի մնայ մեր սրտերուն մէջ: Թող Աստուած խաղաղութիւն եւ հանգստութիւն շնորհէ ննջեցեալին հոգիին, օրինէ Ձեր բոլորին ընտանիքները եւ երկար կեանք պարգեւէ բոլորիդ:

Անկեղծ վշտակցութեամբ՝



Վազգէն Եագուպեան
Հ.Բ.Ը.Մ. Հայաստանի Նախագահ
Հ.Բ.Ը. Միութեան Կեդրոնական Վարչական Ժողովի անդամ

Պեյրոպ, 28 Յուլիս 2022

Ազնուամիայլ
Տիկ Ալին Ճիզմեճեան եւ Դստերք
Գափիրէ-Եգիպտոս

Յարգելիներ,

Հայկական Բարեգործական Ընդհանուր Միութեան Լիբանանի Շրջանակային Յանձնաժողովը, սրտի անհուն կսկիծով իմացաւ մահը՝ Ձեր սիրելի ամուսնոյն ու հոր՝ Տոքթ. Վիզեն Ճիզմեճեանի, որ պատահեցաւ Զորքշաքի, 27 Յուլիս 2022-ին:

ՀԲԸՄիութեան Լիբանանի Շրջանակային Յանձնաժողովին ու Բարեգործականի մեծ ընտանիքին անուևով, սոյն գրութեամբ կու գանք մեր խորագգած ցաակցութիւնները յայտնել Ձեզի, Ձեր անժամանակ ու անդարմանելի կորուստին առիթով:

Վստահ ենք որ Տոքթորին յիշատակը պիտի մնայ անթառամ ու իր բոլոր իրագործումները արձանագրուած՝ ՀԲԸՄիութեան ոսկեմատեաններուն մէջ:

Թող Տերը լուսաւորէ հոգին, ու Ձեզի պարգեւէ երկնային մխիթարութիւն ու համբերութիւն:

Յարգանքներով՝

ՀԲԸՄիութեան
Լիբանանի Շրջանակային Յանձնաժողովի
Ատենապետ



Ժորար Թիֆէնճեան

Պեյրուք, 28 Յուլիս 2022

Յարգարծան վշտակից անդամներ ՀԲԸՄ-ի Գահիրէի Շրջանակային վարչութեան եւ համայն սգակիրներ,

Խոր ցաւով իմացանք Հայկական Բարեգործական Ընդհանուր Միութեան Գահիրէի ատենապետ, հասարակական գործիչ, հրապարակախօս, մտաւորական տոքթ. Վիգէն Հիգմէճեանի անժամանակ, յանկարծակի եւ անողոր մահը:

Դառնօրէն կը սգանք, որովհետեւ այնքա՛ն շուտ հեռացաւ, այնքա՛ն շատ բան տակաւին կրնար կատարել, որովհետեւ տակաւին շատ երազանքներ եւ տեսիլքներ մնացին անստարտ:

Մեր բոլորին համար անմոռանալի պիտի մնայ անոր անսպառ եռանդը, միշտ կենսախիղ կերպարը, խանդավառ ջերմութիւնը, շրջապատին հանդէպ անոր սիրալիր վերաբերմունքը:

Հիմա այս խորհրդատու պահուն կրնանք անվարան հաստատում մը կատարել՝ անգնահատելի պիտի մնայ տոքթ. Վիգէն Հիգմէճեանի ներդրումը ՀԲԸՄ-ի ընտանիքին եւ յատկապէ՛ս ՀԲԸՄ-ի Եգիպտոսի պատմութեան մէջ:

Յանուն Հայ Երիտասարդաց Ընկերակցութեան Կեդրոնական Վարչութեան կը ցաւակցինք Եգիպտոսի շրջանի մեր բոլոր միութենականներուն, հանգուցեալին տիկնոջ Ալինին, անոր երկու դուստրերուն եւ համայն ՀՄԸՄ-Նուպարականներուն:

Ի խորոց սրտէ՛ կ'աղօթենք սիրելի տոքթ. Վիգէն Հիգմէճեանի հոգու խաղաղութեան ու փրկութեան համար:

Խորին ափսոսանքով մեր զլուխները կը խոնարհենք անոր արդար եւ երախտաշատ վաստակին առջեւ:

Տոքթ. Վիգէն Հիգմէճեանի յիշատակը վառ պիտի մնայ բոլոր ՀԲԸՄ-ականներու եւ ՀՄԸՄ-Նուպարականներու սրտին մէջ:

Աստուած խաղաղութիւն պարգեւէ անոր:

ՀԵԸ-ի Կեդրոնական Վարչութեան

Ատենապետ

Յակոբ Թէվիգեան



Ատենապետ

Վիգէն Չերչեան

ՎԻՊԷՆ ՃԻՋՄԷՃԵԱՆ ԼՈՒՍԱՇՈՂ ԱՆՁՆԱԻՈՐՈՒԹԻՒՆԸ

Մարդկային կեանքի մէջ կը հանդիպինք կերպարներու, որոնք կը ցոլացնեն որոշ երանգներ, որոնց ամբողջութիւնը կը ներկայացնէ ենթակային անհատականութիւնը: Որքան շատ ըլլան այդ երանգները, այնքան զգալի կ'ըլլայ ենթակային զատորոշութիւնը իր շրջապատէն: Վիպէն Ճիզմէճեանի պարագային այդ երեւոյթը խիստ զգալի էր:

Իր անհաշիւ եւ սրտաբուխ սատարը այն բոլոր ծրագիրներուն, որոնց իր թանկագին մասնակցութիւնը բերած էր, տուած է օգտաշատ արդիւնք:

Ան ելոյթ ունեցած է հայկական, եգիպտական եւ միջազգային ամպիոններէ, պատուաբեր կերպով ներկայացնելով մեր գաղութը եւ ընդհանրապէս եգիպտոսը:

Հայկական շրջանակին մէջ երբ կը հիմնուէր ՀՄԸՄ-ՆՈՒՊԱՐԻ սկաուտական շարժումը, Վիպէն Ճիզմէճեան հոն էր տիկին Շողիկ Կարիպեանի հետ, առաջնորդելու այդ շարժումը, հասցնելով զայն բարձրագոյն մակարդակի:

Երբ պէտք էր Գահիրէի ՀԲԸՄի կայքէջը ստեղծել, Վիպէն Ճիզմէճեան հոն էր, կայքէջը կազմողին հետ մօտէն զբաղելով բոլոր մանրամասնութիւններով եւ նրբութիւններով:

Երբ պէտք էր ՀՄԸՄ-ՆՈՒՊԱՐ ակումբին պատմութիւնը վերծանել եւ ներկայացնել անոր էութիւնը, Վիպէն Ճիզմէճեան հոն էր, խորանալու արխիւային նիւթերուն մէջ, փաստելու համար, թէ ՀՄԸՄ-ՆՈՒՊԱՐը կազմուած է երկու՝ ՀՄԸՄ եւ ՆՈՒՊԱՐ միութիւններու միաձուլումով: Երբ հարկ էր մշակել եգիպտահայ միջ-ակումբային պասքէթ-պոլի ամառնային մրցաշարքերու օրէնքները, Վիպէն Ճիզմէճեան հոն էր իր գործակիցին՝ Պերճ Միսքճեանին հետ, խմբագրելու համար այդ օրէնքները:

Ասոնցմէ զատ, եգիպտական շրջանակներու մէջ երբ կարիքը եղած է, Վիպէն Ճիզմէճեան մաս կազմած է եգիպտական ֆութպոլի ֆետերասիոնին, ուր անմնացորդ նուիրումով ծառայած է, կազմելով ֆետերասիոնի օրէնքներուն համակարգը: Վիպէն Ճիզմէճեան հոն էր, որպէս 20 տարեկանէն վար ֆութպոլիստներու համաշխարհային մրցաշարքին ծրագրման ընդհանուր տնօրէն:

Վիզեն Ճիզմեճեան հոն էր, երբ կարիքը կար FIFAի կողմէ քըն-նիչ մը նշանակելու, Գանատային մէջ տեղի ունեցած ֆութպոլի պատանեկան համաշխարհային մրցաշարքին:

Հոն էր Վիզեն Ճիզմեճեան, երբ պահանջը կար ֆութպոլի ընդարձակ ասպարէզին մէջ բարձր եւ պատասխանատու պաշտօններ վերցնելու:

Միջազգային ձեռնակներու կազմակերպութեան մէջ իր ձեռք ձգած փորձառութիւնը օգտակար եղաւ իր սիրած միութեան 100-ամեակին առիթով, 2006 թուականին Գահիրէի մէջ կազմակերպուած տօնակատարութիւններուն որակը փրոֆեսիոնալ մակարդակի հասցնելու:

Կ'արժէ յիշել, որ Վիզեն Ճիզմեճեան երբեւէ հետամուտ չէ եղած տիտղոսաւոր պաշտօններու, որուն փաստը այն է, որ երկար տարիներ ՀԲԸՄի Գահիրէի վարչութեան անդամակցած է օժանդակի կարգավիճակով: Սակայն երբ 2007 թուականին տեղի ունեցած ընտրութիւններուն, գնահատելով իր լուռ եւ նուիրեալ աշխատանքը, միաձայնութեամբ ընտրուած է Միութեան վարչութեան ատենապետ, այդ պաշտօնը ձեռնհասօրէն վարած է մինչեւ իր վաղահաս մահը:

Եւ այս լուսաշող մարդուն բաշխած յորդառատ լոյսը, ճակատագրին յեղակարծ մէկ խաղով կը կտրուէր եւ մենք բոլորս կը կորսուէինք խոր մթութեան մէջ, խարխափելով փնտռելով լոյսի այն աղբիւրը, որուն վարժուած էինք, եւ որ, աւաղ, անվերադարձ մեկնած է:

Կը մաղթենք, որ տիրող մթութիւնը տակաւ փարատի եւ այս լուսաշող մարդուն յաջորդող նորեր գան, իր թողած հսկայ բացը գոցելու:

Վիզեն Ճիզմեճեանի անմոռանալի տիպարը միշտ պիտի յիշուի զինք ճանչցողներուն եւ իր հետ գործակցողներուն կողմէ, որպէս շրջապատին անսակարկ նուիրումով ծառայած անձնաւորութիւն:

Յարգանք իր բարի ու նուիրեալ կեանքին եւ խունկ ու աղօթք իր յիշատակին:

Պ.Թ.

ՏՈՔԹՈՐ ՎԻԳԷՆ ՃԻԶՄԷՃԵԱՆԻ ԽՕՍՔԸ
ՀԲԸՄԻ ԳԱՀԻՐԷԻ ՄԱՍՆԱՃԻՂԻ
100-ԱՄԵԱԿԻՆ ԱՌԻԹՈՎ

Գերաշնորհ Սրբազան Հայր եւ Արհիապատիւ Գերապայծառ Հայր,

Նորին Գերազանցութիւն ՀՀի Արտակարգ եւ Լիազօր Դեսպան,

Մեծայարգ Ատենապետ Գահիրէի Քաղաքական Ժողովի եւ Ազնուափայլ Տիկին,

Պատուարժան Ներկայացուցիչ Հայկական Բարեգործական Ընդհանուր Միութեան “Կարպիս Փափագեան Մրցանակ”ի Յանձնախումբի,

Հոգեշնորհ եւ Արժանապատիւ Հայրեր, Մշակութային, Մարզական եւ Բարեսիրական Միութիւններու Ներկայացուցիչներ եւ Սիրելի Ներկաներ,

Բաւական դժուար պիտի ըլլայ կարճ ժամանակամիջոցի մը մէջ անդրադառնալ Հայկական Բարեգործական Ընդհանուր Միութեան Գահիրէի Մասնաճիւղին հիմնադրութեան, եւ ներկայացնել անոր հարիւրամեայ պատմութիւնն ու գործունէութիւնը: Ուստի, պիտի փորձեմ ամփոփ գիծերով ներկայացնել Գահիրէի Բարեգործականի հիմնական սկզբունքները եւ գործունէութեան նպատակները, որոնք սկիզբէն որդեգրուած են եւ կը շարունակուին յարգուիլ մինչեւ այսօր:

Բարեգործականը իր հիմնադրութեան առաջին օրէն իսկ, յաջողեցաւ պահել իր կենսունակութիւնը եւ յատուկ գործունէութիւնը, շնորհիւ իմաստուն հիմնադիրներուն գործադրած սկզբունքներուն եւ հետապնդած նպատակներուն, ինչպէս նաեւ անոնց յաջորդող ողջամիտ ղեկավարներուն, որոնք տարիներու ընթացքին գիտակցութեամբ եւ նուիրումով աշխատած են գործադրել, պահպանել եւ զարգացնել զանոնք: ՀԲԸՄ-ի հիմնադիրները եղած են բարձրագոյն կրթութեան տէր անձնաւորութիւններ, հմուտ մասնագէտներ, դիւանագէտներ,

դրամատերեր, պետական պատասխանատուներ, յարգանք վայելող եւ պարտադրող արժանաւոր ազգայիններ, գնահատւած հայ թէ օտար շրջանակներէ: Այսպիսի անձեր էին Պօղոս Նուպար Փաշան, Եագուպ Արթին Փաշան, Երուանդ Պէյ Աղաթօնը, Գրիգոր Եղիայեանը, Առաքել Պէյ Նուպարը, Տոքթ. Նազարէթ Տաղաւարեանը, Մկրտիչ Պէյ Մարկոստֆը եւ Յովհաննէս Յակոբեանը: Այս մեծանուն անհատները, մէկդի դնելով իրենց անձնական շահերն ու մտահոգութիւնները, հիմնեցին ՀԲԸՄ-ը 1906ին, յօգուտ հայ ժողովուրդին եւ անոր ազգային շահերուն:

Նման բարձր նկարագրի տէր անձեր էին նաեւ Գահիրէի Բարեգործականի 1910-ի անդրանիկ վարչութեան անդամները, ատենապետութեամբ Միհրան Ղազարոսեանի:

Եգիպտոսի մէջ, Գահիրէի Բարեգործականը յաջողեցաւ պահել իր կենսունակութիւնը եւ շարունակեց բարգաւաճիլ, շնորհիւ բոլոր ժամանակներու իր ողջամիտ ղեկավարներուն անխախտելի նուիրումին, որոնք հաւատարիմ մնացին Միութեան սկզբունքներուն եւ ունեցան աշխոյժ գործունէութիւն, համապատասխան իրենց ունեցած միջոցներուն եւ դրամագլուխին: Շնորհիւ ազգային հարցերուն հանդէպ անոնց ունեցած խոհեմ եւ իրատես մօտեցումին, Միութեան դրամագլուխին անոնց խղճամիտ յանձանձումին եւ անոնց անշահախնդիր գործունէութեան, այսօր Գահիրէի Բարեգործականը կը կանգնի իբրեւ առողջ, զօրաւոր եւ գործօն կազմակերպութիւն մը եգիպտահայ գաղութէն ներս: Այդ իսկ պատճառաւ, տարիներու ընթացքին, բարերարներ մեծագումար նուիրատուութիւններ կատարած են, որոնցմէ ամենակարեւորը եղած է 1976-ին Տիկին Սաթենիկ Չագըրինը, որ Գահիրէի Բարեգործականին նուիրեց իր Զամալէքի շքեղ մենատունը, քովի ընդարձակ հողամասով: Այս արքայական նուիրատուութիւնը կարելոր անկիւնադարձ մը եղաւ Գահիրէի Բարեգործականի պատմութեան մէջ, անոր առջեւ բանալով բազմաթիւ մշակութային եւ բարեսիրական գործունէութեանց նոր դռներ, սակայն, միեւնոյն ժամանակ, անոր ուսերուն վրայ դրաւ ծանր եւ պատասխանատու պարտաւորութիւններ: Սաթենիկ Չագըր մահացաւ 1982-ին, այսինքն իր կատարած նուիրատուութենէն վեց տարի ետք: Գահիրէի

Բարեգործականի վարչությունը օրինական եւ գործնական նկատումներով 1992-ին որոշեց կալուածը երկու մասի բաժնել՝ պարապ հողամասը, շուրջ 1750 քռ մ. տարածութեամբ եւ մնացեալը՝ մենատունը իր շուրջի տարածքով, շուրջ 2340 քռ մ.: Յունուար 1996-ին, հրապարակային աճուրդով մենատան քովի պարապ հողամասը վաճառուեցաւ մօտաւորապէս 16 միլիոն Ե.Ու-ի եւ գումարը փոխանցուեցաւ “Սաթենիկ Չագըր” Հիմնադրամին, Գահիրէի Բարեգործականի հոգատարութեան տակ: Իսկ շքեղ մենատունը՝ խորհրդանշական վարձքով տրամադրուեցաւ Հայաստանի Հանրապետութեան դեսպանութեան:

Միութեան Կազմական Կանոնագրին մէջ գործադրելի նպատակներէն, որոնք նշուած են ձեր տրամադրութեան տակ եղող գրքոյկներուն մէջ, պիտի յիշեմ միայն հետեւեալ գլխաւոր կէտերը՝ Առողջապահական գործունէութիւն, Նիւթական օգնութիւն գաղութիս կարիքաւոր անձերուն, Ուսումնական օժանդակութիւն, Գիրքերու հրատարակութիւն, Նիւթական օժանդակութիւններ հայկական հաստատութիւններու, Քաջալերել Եգիպտոսի հայ համայնքի զաւակները ուսումնասիրելու հայ լեզուն եւ հայ մշակոյթը, Արուեստագէտներու քաջալերութիւն, ձեռքբերում եւ ցուցադրութիւն անոնց գործերուն, Քաջալերանք երիտասարդական գործունէութեան, կազմակերպելով ճամբարներ, զբօսապտոյտներ եւ հաւաքներ: Քաջալերանք մշակութային ժառանգութեան ուսումնասիրութիւններու եւ պրպտումներու, Մշակութային հանդիսութիւններու, ասուլիսներու եւ ցուցահանդէսներու կազմակերպութիւն:

Ասոնք եղած են Բարեգործականի “Չագըր Հիմնադրամ”ին սկզբունքներն ու նպատակները եւ գործնական գետնի վրայ ասոնք են, 1996-էն սկսեալ մինչեւ այսօր, Գահիրէի Բարեգործականի գործունէութեան դաշտը: Այսպիսով, Գահիրէի Բարեգործականը, որ կտակակատարն է “Չագըր Հիմնադրամ”ին, զայն յանձն առած է Բարեգործականի սկզբունքներուն համաձայն, այսինքն թէ Միութիւնը ապաքաղաքական եւ ոչ յարանուանական կազմակերպութիւն մըն է: Մէկ խօսքով, մեր գաղութի բոլոր հայերը կրնան օգտուիլ Բարեգործականի յատկացումներէն: “Սաթենիկ Չագըր” Հիմնադրամի միջոցներով, բազմաթիւ

հայորդիներ կ'ուսանին վարժարաններու եւ մեծագումար կրթաթոշակ պահանջող բարձրագոյն ուսումնական հիմնարկներու մէջ, Գահիրէի Բարեգործականը, ընկերային օժանդակութեան ծիրին մէջ, դարմանի եւ ապրուստի յատկացումներ կ'ընէ կարիքաւոր եգիպտահայերու: Նաեւ Չագըր Հիմնադրամի առողջապահական հոգատարութեան ծրագրէն (Medicare) կ'օգտուին գաղութին զաւակներէն հարիւրաւորներ: Բազմաթիւ կարիքաւորներ կը ստանան նաեւ ապրուստի ամսական յատկացումներ:

Երգարուեստի եւ երաժշտութեան մարզին մէջ, 2004-էն սկսեալ, Գահիրէի Բարեգործականի կազմած «Ծիածան» մանկական երգչախումբը, ղեկավարութեամբ Մօ. Միհրան Ղազէլեանի, սիրայօժար օժանդակութեամբ իր տիկնոջ Գոհարի եւ Տիկին Նանօր Աբիկեանի, շատ կարելոր ներդրում ունի մեր նոր սերունդին հայեցի դաստիարակութեան մէջ:

Հայաստանէն եւ Սփիւռքէն կարելոր առիթներով հրաւիրած ենք մեներգիչներ, դաշնակահարներ, պարախումբեր եւ թատերախումբեր. ինչպէս նաեւ պատմաբաններ, դասախօսներ եւ արուեստաբաններ:

Հիմնադրամին միջոցներով կը կազմակերպենք ճամբարներ, որոնց մասնակցած են Սուրիայէն եւ Լիբանանէն երիտասարդներ: Նաեւ բազմաթիւ պատանիներ եւ երիտասարդներ Հայաստան եւ Սուրիա ղրկած ենք:

Մշակութային գործունէութեան ծիրէն ներս, հիմնադրամի միջոցներով, հրատարակուած են աւելի քան 70 գիրքեր եւ պրակներ հայերէն, արաբերէն եւ անգլերէն լեզուներով (այսօր անոնց թիւը հասած է 100-ի. Խմբ.): Հրատարակչական գործին մաս կը կազմէ նաեւ Միութեան “Տեղեկատու” եռամսեայ պարբերաթերթը հայերէն լեզուով, եւ “Արեգ” ամսօրեան արաբերէն լեզուով. Այս վերջինը կարելոր դեր կը կատարէ ծանօթացնելով հայութիւնը եւ հայկական տեսակէտները եգիպտացի եւ արաբ ժողովուրդին: Նոյնքան կարելոր դեր կը կատարէ Գահիրէի Բարեգործականի կայքէջը՝ agbuegypt.comը, որ Եգիպտոսի Բարեգործականի միութենական կեանքէն, ինչպէս նաեւ անոր մարզական թելին՝ “ՀՄԸՄ-Նուպար”էն տեղեկութիւններ կը հաղորդէ ամբողջ աշխարհին:

Մանրաժապավենի վրայ կատարած ենք եգիպտահայ մամուլի երեք թերթերուն՝ «Արեւ»ի, «Յուսաբեր»ի եւ «Ջահակիր»ի հաւաքածոներուն պատճենահանումը:

Յատկացումներ կատարուած են պետական եւ համաեգիպտական ծրագիրներու, ինչպէս համալսարաններու կարօտեալ ուսանողներու Ֆոնտին, Սիւզան Մուպարաքի ընկերային եւ բարեսիրական ծրագիրներուն եւ Գահիրէի Համալսարանի Հայագիտական Ուսումնասիրութիւններու Կեդրոնին:

Գահիրէի Բարեգործականը կը քաջալերէ մտաւորականներն ու արուեստագէտները ստեղծագործելու, նիւթական օժանդակութիւններ յատկացնելով անոնց, ուսումնասիրական եւ ստեղծագործական պարապմունքներու համար:

Կ'ուզէի այստեղ շեշտել, թէ մեր կազմակերպած ձեռնարկներու պարագային կ'աշխատինք որ ներկայացումներէն օգտուին թէ՛ Գահիրէի եւ թէ՛ Աղեքսանդրիոյ հայերը: Երգարուեստի, երաժշտութեան ձեռնարկներուն կամ ցուցահանդէսներուն, երբ կարելիութիւնը ըլլայ, կը փորձենք մեր ներկայացումներուն հրաւիրել եգիպտացի ժողովուրդը:

Տեղին է յիշել նաեւ, թէ Գահիրէի Բարեգործականը 2001 թուականէն սկսեալ ձեռնարկած է կարելոր, մեծածաւալ ծրագրի մը իրագործման: Այդ ծրագիրը կը նախատեսէ 1878-էն 1923-ի միջեւ Եգիպտոսի մէջ լոյս տեսած բոլոր թերթերուն մէջէն հաւաքել արաբերէն լեզուով լոյս տեսած Հայաստանի եւ հայերուն վերաբերեալ բոլոր գրութիւնները, նկարահանել զանոնք, ապա դասաւորել: Այս դժուարին պարտականութիւնը յանձնուած է տոքթ. Մոհամէտ Ռիֆաաթ Էլ Իմամի, որուն գլխաւորութեամբ երեք հոգինոց յանձնախումբ մը, Մարտ 2001-էն մինչեւ Մայիս 2009, քննած է Եգիպտոսի Ազգային Գրադարանի աւելի քան 2000 անուններով թերթերու եւ պարբերականներու հաւաքածոները, անոնց 750-ին մէջէն ընտրելով եւ նկարահանելով 37.600 նիւթեր: Այս նիւթերու հաւաքագրումը, նկարահանումը եւ դասաւորումը առաւ մօտ 9 տարի: Այժմ անցած ենք այս կարելոր աշխատանքին երկրորդ հանգրուանին՝ հաւաքուած նիւթերը դասաւորել, ուսումնասիրել եւ հրատարակել, սկսելով հայկական ցեղասպանութենէն, այդ ժամանակա-

միջոցին եգիպտացի կամ արաբ թղթակիցներու գրութիւնները եւ ականատեսներու վկայութիւնները արաբերէն լեզուով հրատարակելով: Ուսումնասիրութիւններ պիտի կատարուին եւ հրատարակուին նաեւ այդ ժամանակաշրջանի եգիպտահայ նշանաւոր անձնաւորութիւններուն մասին, որոնք մեծապէս սատարած են Եգիպտոսի մշակութային, տնտեսական եւ քաղաքական կեանքի վերելքին: Կը կարծենք թէ այս ծրագրին իրագործումը քանի մը տարիէն, շատ մեծ փաստագրական նշանակութիւն ունեցող արդիւնաւոր աշխատասիրութիւն մը պիտի ըլլայ եւ մեծ նպաստ պիտի բերէ հայութեան:

Գահիրէի Բարեգործականի Մասնաճիւղի կատարած այսպիսի կարեւոր գործունէութեանց շարքը շատ երկար է: Ան մէկ դարէ ի վեր կը գործէ, նպատակ ունենալով օգտակար ըլլալ եգիպտահայ գաղութին եւ հայութեան: Կը մաղթենք, որ գիտակից, իմաստուն ղեկավարներու առաջնորդութեամբ, այս Բարեսիրական Միութիւնը ընդմիշտ գոյատեւէ, շարունակէ իր բազմաբնոյթ մարդասիրական գործունէութիւնը եւ յաջողութեամբ իրագործէ հայ ժողովուրդին ակնկալութիւնները:

Բարի մաղթանքներ բոլորիդ եւ շնորհակալութիւն ձեր համբերատար ուշադրութեան համար:

«Տեղեկագրու» թիւ 57, Հոկտեմբեր 2010, էջ 11-13

ՀԲԸՄ-Ի 110-ԱՄԵԱԿԻՆ ԱՌԻԹՈՎ ՀԱՐՑԱԶՐՈՅՑ ԳԱՀԻՐԵԻ ՄԱՍՆԱՃԻՂԻ ՎԱՐՉՈՒԹԵԱՆ ԱՏԵՆԱՊԵՏ ՏՈՔԹ. ՎԻԳԵՆ ՃԻԶՄԵՃԵԱՆԻ ՀԵՏ

Տոքթ. Վիգեն Ճիգմեճեան (ատամնաբոյժ), կու գայ ամբողջացնելու շարքը Սփիւռքի մեծ միութիւններէն մէկուն՝ ՀԲԸՄ-ի ատենապետներուն, որոնց գործը տարուէ տարի աւելի ճիգ պահանջող կը դառնայ, ներկայ ժամանակի բարդ իրավիճակներուն եւ սփիւռքահայութեան կրած վերիվայրումներուն պատճառով:

Տոքթ. Ճիգմեճեան իր նախակրթութիւնը ստացած է Բելիոպոլսոյ (Գահիրէ) Նուպարեան Ազգ. Վարժարանէն ներս, երբ տակաւին երկու առանձին վարժարաններ էին Գալուստեանն ու Նուպարեանը:

Լեզուներու իմացութեամբ եւ նախապէս վարած պաշտօններով տոքթ. Ճիգմեճեան եռանդուն աշխատանքի աւանդութիւն մը բերած է իր հետ, աւանդութիւն մը, որուն իրագործումներուն ակա՛նատես եղանք անցնող շրջանի ձեռնարկներուն ընդմէջէն:

Կարծեք պատրաստման շրջան մը եղած ըլլար Տոքթ. Ճիգմեճեանի արտա-հայկական գործունեութիւնը, ինչպէս ֆութպոլի Ափրիկեան Լիկայի բանբեր, բազմիցս մամլոյ աշխատակից ՖԻՖԱ-ի, անդամ եգիպտական ֆութպոլի ֆետերասիոնի վարչական խորհուրդին եւ այլ աշխատանքներ:

Թուելու համար համայնքային իր ծառայութիւնները՝ կանուխէն անդամակցած է ՀԲԸՄի մեծ ընտանիքին, եղած է անդամ «Կռունկ» երգչախումբին, խմբապետ Գահիրէի ՀՄԸՄ ՆՈՒՊԱՐԻ սկաուտական շարժումին, անդամ ՀՄԸՄ ՆՈՒՊԱՐԻ վարչութեան, Գահիրէի Հայ Առաքելական եկեղեցւոյ հոգաբարձութեան, Գահիրէի պատկառելի Թեմական ժողովին, ՀԲԸՄի Եգիպտոսի Շրջանակային Յանձնաժողովին եւ ՀԲԸՄ-ի Գահիրէի մասնաճիւղին:

Երիտասարդական կորովով տոքթ. Ճիգմեճեան հիմը դրած է Գահիրէի ՀԲԸՄ-ի կայքէջին (agbuegypt.com), որ այսօր իր տասնամեակը կը նշէ:

Պէտք է յիշել այլ շատ կարեւոր ձեռնարկ մը եւս, որուն եռանդով լծուած է յարգելի ատենապետը՝ ընդհանրապէս միջազգային եւ մասնաւորապէս արաբական մամուլին նուիրուած կայքէջ մը, ուր հաւաքուած են եւ պիտի երեւին բոլոր այն յօդուածները, որոնք անդրադարձած են եւ կը շարունակեն անդրադառնալ Հայոց Ցեղասպանութեան, Մեծ Եղեռնին եւ Հայկական Դատին:

ՀԲԸՄ-ի 110-ամեակին առիթով «Տեղեկատու»ին կողմէ տիկ. Մ. Երամեան հարցազրույց մը ունեցաւ տոքթ. Ճիգմեճեանի հետ, զոր կը ներկայացնենք այստեղ:

Հարցում Ա. - Որպէս ՀԲԸՄ-ի Գահիրէի մասնաճիւղի Ատենապետ, ինչպիսի՞ դժուարութիւններ եւ մարտահրաւերներ կը կարծէք որ կը դիմագրաւէ Մասնաճիւղը այս դժուար օրերուն:

Տոքթ. Վիգէն Ճիգմեճեան - Հայկական Բարեգործական Ընդհանուր Միութիւնը, հայաշխարհի մեծագոյն ոչ-հասութաբեր կազմակերպութիւններէն մէկը, ունի 31 երկիրներու մէջ գործող 74 մասնաճիւղեր, որոնցմէ մէկն է ՀԲԸՄ-ի Գահիրէի մասնաճիւղը: Մեր մասնաճիւղն ալ, մնացեալներուն նման նուիրուած է հայկական աւանդութիւններու պահպանումին, դաստիարակչական, մշակութային եւ մարդասիրական ծրագիրներու ընդմէջէն:

Եթէ նկատի առնենք ՀԲԸՄ-ի դիմագրաւած դժուարութիւններն ու մարտահրաւերները վերջին շրջանին, պետք է նշենք Միջին Արեւելքի անկայունութենէն ծնած հարցերը, մանաւանդ Սուրիոյ մէջ, ուր ցարդ մեծ թիով հայեր կ'ապրին եւ որոնք անմիջական օգնութեան կարիք ունին: Մեծ ճիգեր թափուած են ՀԲԸՄիութեան կողմէ մարդասիրական օգնութիւն կազմակերպելու եւ այդ շրջանի հայերուն նեցուկ կանգնելու համար:

Ատրպէյճանի աճող թշնամանքը Լեռնային Ղարաբաղի հանդեպ կը վտանգէ մեր ժողովուրդը Հայաստանի եւ Արցախի տարածքին: ՀԲԸՄիութիւնը կ'աշխատի նիւթական եւ կազմակերպչական օգնութիւն ապահովել այդ շրջանի հայութեան:

ՀԲԸՄ-ի մեծագոյն մարտահրաւերներէն մէկն ալ իր միջոցներուն հաւասարակշռուած բաշխումն է Հայաստանի, Արցախի եւ Սփիւռքի միջեւ, ինչպէս եւ նոր միջոցներու - մարդկային թէ նիւթական - ապահովումը, իր ծրագիրներուն հեզասահ իրագործումին համար: ՀԲԸՄ-ը իր մարդասիրական բազմաթիւ ծրագիրներով, ըստ վիճակագրութեան, կը նպաստէ աւելի քան 500.000 հայերու, աշխարհի տարածքին:

Հարցում Բ. - Յատկապէս եգիպտահայ գաղութի պարագային ի՞նչ դժուարութիւններ կը տեսնէք շատ մօտիկ ապագային համար:

Վ. Ճ. Որպէս յառաջապահ եւ անցեալին մեծաթիւ գաղութ, ստիպուած ենք ընդունիլ, որ թէեւ դանդաղ, բայց հաստատօրէն դեպի նուաղում կը դիմենք:

Որպէս Սփիւռքի առաջին գաղութներէն մէկը, կարիքը կը զգանք նոր ձեւեր որդեգրելու, այս նուաղումը կասեցնելու համար, աւե-

լին՝ կարենալ ստեղծելու մշակութային այնպիսի մթնոլորտ մը, որ մղենք հայերը տեղական կարելիութիւններէն օգտուելու եւ իրենց ամբողջ ներուժը ի սպաս դնելու իմաստուն կերպով մշակուած ծրագիրներու իրագործման:

Իսկ եթէ գաղթ անպայման պիտի ըլլայ, մենք մէկ ուղղութիւն կը քաջալերենք՝ դէպի հայրենիք:

Շնորհիւ եգիպտահայ համայնքի բարեկեցութեան եւ անոր ղեկավարներու իմաստուն ծրագրումին, կրնանք այս ներուժը ճիշդ ձեւով օգտագործել:

Յաջորդ գերխնդիրը հայկական ինքնութեան պահպանումն է՝ լեզու եւ մշակութային ժառանգութիւն, որոնք Սփիւռքի բոլոր համայնքներուն համար ալ հարց դարձած են, հարց որ կրնայ նուազ տարողութիւն ունենալ Արեւմուտքի համայնքներուն մէջ, բայց մեզի, եգիպտահայերու համար մտահոգիչ երեւոյթ է: Սպասելի է որ աւելի եռանդուն ըլլայ դերը ընտանիքներուն, դպրոցներուն, ինչպէս նաեւ մշակութային թէ մարզական ակումբներուն, հայկական ինքնութիւնը մշակելու եւ տղաքը այդ ինքնութեամբ խանդավառելու համար, իւրաքանչիւր կառոյց ի՞ր տարածքին մէջ կարելին ընելով: Ընկերութեան տարբեր խաւերու ճիգերուն միաձուլումով է միայն, որ կրնանք հայկական ինքնութեան եւ ժառանգութեան կարելորութիւնը հաստատել: Գահիրէի ՀԲԸՄ-ի անդամներս կը հաւատանք, որ կարելոր դեր մը ունինք կատարելիք այստեղ, մշակութային եւ դաստիարակչական մեծ թիւով ձեռնարկներ կազմակերպելով եւ հերթական հանդիպումներով, ինչպէս մանկական երգչախումբին եւ հայերէն լեզուի դասընթացքներուն պարագան է:

Եգիպտահայութեան մեծագոյն մարտահրաւերը իր գոյութեան պահպանումն իսկ է:

Գահիրէի մէջ մեր միութիւնը կարգ մը դժուարութիւններ կը դիմագրաւէ.

-Հետզհետէ աճող թիւը եգիպտահայերու, որոնք կարիքը ունին օգնութեան, կարենալ շրջանցելու համար իրենց բժշկական, ուսումնական թէ նիւթական դժուարութիւնները, նկատի առնելով երկրին սղաճը, մանաւանդ յիշուած մարզերէն ներս: Ազգային Իշխանութեան օժանդակութիւնը, կարգ մը պարագաներու, կը սատարէ նիւթական մեր ծանր բեռը կրելու:

Կարիքաւոր եգիպտահայոց օգնելը միութեանս գլխաւոր առաջնահերթութիւններէն մէկն է:

-Միութեանս գիտակցութիւնը մշակութային եւ ուսումնական

ծրագիրներու կարելորութեան, որ կը հակադրուի համայնքին զաւակներուն մօտ հետզհետէ նուազող հետաքրքրութիւններուն, մշակոյթի մարզէն ներս՝ դասախօսութիւններու, մշակութային ձեռնարկներու եւ գիրքերու հրատարակութեան առնչութեամբ:

Օրինակ մը տալու համար ըսեմ որ անցնող հինգ ամիսներուն կազմակերպուած երեք դասախօսութիւններուն եւ մշակութային երկու ձեռնարկներուն, որոնց կարելոր անձնաւորութիւններ հրաւիրուած էին, ինչպէս Երուանոյ Չօրեան՝ AVC-ի հիմնադիր-տնօրէնը, կամ Րաֆֆի Պետրոսեան մտաւորականը, որ դասախօսեց իսլամացած հայերու մասին, կամ Դոկտ. Ռեյմոն Գեորգեան, որ հիւրաբար Գահիրէ կը գտնուէր իր վերջին գիրքին արաբերէնի թարգմանութեան առիթով ... հակառակ այս կարկառուն անուններուն, ներկաներուն թիւը սպասուածին չափ չէր:

Հակառակ այս երեւոյթներուն, մենք որոշած ենք շարունակել մշակութային եւ դաստիարակչական առիթներ հայթայթել, որովհետեւ համոզուած ենք թէ որպէս միութիւն, մենք պարտականութիւն մը եւ ժառանգուած առաքելութիւն մը ունինք այս առումով: Յարատեւութեամբ է միայն որ կարելի է նպատակներուն հասնիլ: Մշակութային եւ դաստիարակչական ձեռնարկներէ ձեռք քաշելը, կրնայ մեզ մեր ժառանգութեան հանդէպ հետաքրքրութեան շիջումի տանիլ: Նման բան թոյլատրելի չէ:

Հարցում Գ. - Այս դժուարութիւնները դիմագրաւելու համար դասական միջոցները կը բաւէ՞ն այսօր, թե՞ կը կարծէք որ նոր միջոցներու կարիք պիտի զգացուի: Ինչպիսի՞ միջոցներ կը պատկերացնէք:

Վ. Ճ. Դասական միջոցները ոչ միայն բաւարար չեն, այլ եւ ժամանակավրէպ եւ անարդիւնք են:

Օրինակ, հայկական ինքնութեան պահպանումին համար, Գահիրէի ԶԲԸՄ-ը նոր մեթոտներու կը դիմէ հայերէն լեզուի, մշակոյթի եւ պատմութեան դասաւանդումին համար AVC-ի միջոցով, հայերէնը տարածելու եգիպտահայոց մէջ, ե՛ւ նոր սորվողներու, ե՛ւ իրենց գիտցածը ամրապնդել փափաքողներու համար: Անցեալ Փետրուարին սկսած ենք հայերէնի դասարան մը, ԶԲԸՄ-ի Ս. Չազըր կեդրոնէն ներս, 23 աշակերտներով, մեծամասնութիւնը՝ ոչ հայախօս: Դասերուն կը հետեւին տիկ. Աննա Թրայեան, Լալա Նիկոլեանի եւ Սիլվա Պայրամեանի դասաւանդումով, երեքն ալ ԶԲԸՄ-ի կողմէ նշանակուած: Այս դասերը մեծ յաջողութիւն արձանագրած են, լեզուն մշակոյթն ու ինքնութիւնը տարածելու դասա-

լանդումի նոր ձեւերու շնորհիւ: Ասոր զուգահեռ ունինք ճատրակի ակումբ մը, AVCի ճատրակի երկու մակարդակներու դասընթացները ավարտողներուն, որոնց համար այս սիրելի խաղը նաեւ առիթ է համախմբուելու:

Երկու կայքէջերու՝ www.agbuegypt.com, նորահաստատ www.arminmedia.com եւ մեր դիմատետրեան (facebook) էջէն եւս կը հասնինք բոլոր հայերուն: Մինչ առաջին կայքէջը մեր Միութեան ծրագիրներուն եւ աշխատանքներուն նուիրուած է, անելի արագ եւ դիւրին միջոցներով եզիպտահայերուն հասնելու համար, երկրորդը անելի մասնագիտական կայքէջ մըն է, արաբախօս մասնագետներու եւ անհատներու համար, որոնք կ'ուզեն ծանօթանալ բոլոր այն յօդուածներուն, որոնք լոյս տեսած են արաբական աշխարհի մամուլին մէջ, 1876-1923 թուականներուն:

Համոզուած ենք որ այս օրերուն հաղորդակցութիւնը արթնութիւն տարածելու գլխաւոր միջոցն է. ահա թէ ինչո՞ւ ծրագրած ենք անելի տարածուիլ՝ այս մարզէն ներս, հաղորդակցական եւ կիրառական նոր գործիքներու (applications, apps.) օգտագործումով, երիտասարդներ ներգրաւելով, որպէսզի անոնք պատրաստ ըլլան աշխատելու մեր նախնիներու ոգիով, բայց եւ նոր մտածելակերպով, մեր միութեան նպատակները իրագործելու համար: Նոր մարտահրաւերները նոր միջոցներ կը պարտադրեն, իսկ ասիկա կ'իրագործուի միացեալ ճիգերովը փորձառու անդամներու, եւ նոր շունչով ու նոր մտածելակերպով գործող երիտասարդներու:

Հարցում Դ. - Ի՞նչ են յարաբերութիւնները այլ գաղութներու ՀԲԸՄ-ի քոյր մասնաճիւղերուն հետ: Նման կապեր ինչպիսի՞ օգտակարութիւն կ'ունենան, բոլոր կողմերուն համար:

Համագործակցութիւնը տարբեր մասնաճիւղերու միջեւ շատ կարեւոր ազդակ մըն է, որ կ'օգնէ զօրացնելու յարաբերութիւնները ղեկավարներուն, մասնաւորաբար գաղութներու երիտասարդներուն միջեւ, կ'օգնէ անոնց որ արդիւնաւետ կապեր ունենան մարզական, մշակութային, դաստիարակչական թէ վարչական մակարդակներու վրայ:

Գահիրէի մասնաճիւղը անցեալին նման կապեր ունեցած է այս մարզերէն ներս, մասնաւորաբար Միջին Արեւելքի մասնաճիւղերուն, ինչպէս Կիպրոսի ՀԲԸՄ-ի, ՀԲԸՄ-ի Լիբանանի Շրջանակային Յանձնաժողովին, Պէյրութի ՀԲԸՄ-ի մասնաճիւղին եւ Հայ Երիտասարդաց Ընկերակցութեան, կամ Սուրիոյ Շ. Յ.ին եւ Հալէպի, Դամասկոսի եւ Բեսապի մասնաճիւղերուն միջեւ: Չբօսա-

պտոյտներ կատարուած են մարզական խաղերու եւ մրցումներու, սկաուտական բանակումներու, պարաօլիմպիկ երգչախմբային ելոյթներու համար: Նման փոխադարձ այցելութիւններ դժբախտաբար կիսով դադրեցան, «Արաբական Գարուն»-ին քաղաքական անկայունութեան հետեւանքով, կարգ մը քաղաքներու մէջ, ուր ԶԲԸՄը շատ արդիւնաւետ գործունէութիւն ուներ:

Գաղափար մը տալու համար այս փոխադարձ կապերէն, ըսենք որ մէկ տարուան մէջ միայն, ԶԲԸՄ-ի Գահիրէի «Ծիածան» մանկական երգչախումբը ելոյթներ ունեցաւ Զալէպի մէջ 2009 թուականին, ԶԲԸՄ-ՅԵԸ Զալէպի եւ ԶԲԸՄ-ՅԵԸ Պէյրութի մասնաճիւղերը իրենց քսան ղեկավարներով եւ երիտասարդներով մասնակցեցան Գահիրէի ԶԲԸՄ-ի կազմակերպած Ուատի Գեմբ բանակումին, Փետրուար 2010ին, ԶԲԸՄ Սիտնիի Վահրամ Փափազեան թատերախումբը ելոյթ ունեցաւ Գահիրէի մէջ Սեպտեմբեր 2010ին, ճիշդ նոյն թուականին ԶԲԸՄ-ՅԵԸ «Անդրանիկ» տղոց եւ աղջկանց խումբերը պասքէթպոլի մրցումներ ունեցան ԶԲԸՄ Գահիրէի տղոց հետ: Այս փոխադարձ մրցումներուն վերջինը մեր ԶՍԸՄ ՆՈՒՊԱՐԻ տղոց եւ աղջկանց խումբերուն մրցումներն էին Պէյրութի մէջ, 2010ի Նոյեմբերին, խաղալով ԶԲԸՄ-ՅԵԸ Պէյրութի եւ Զայկազեան համալսարանի խումբերուն դէմ:

Այս օրերուն փոխ յարաբերութիւնները վարչական մակարդակի վրայ են միայն, ԶԲԸՄ-ի կեդրոնին եւ մասնաճիւղերուն միջեւ, նուազ չափով՝ Սիջին Արեւելքի մասնաճիւղերուն միջեւ: Կը յուսանք որ քաղաքական կայունութեան հետ պիտի վերագտնենք մեր նախկին փոխադարձ յարաբերութիւնները:

Յարցում Ե. - Գիտենք թէ Գահիրէի ԶԲԸՄ-ը լաւ յարաբերութիւններ ունի մէկ կողմէ Գահիրէի Ազգային Իշխանութեան, միւս կողմէ՝ Զայաստանի Զանրապետութեան Գահիրէի դեսպանատան հետ: Կրնա՞ք որոշ գաղափար մը տալ, թէ ի՞նչ մարզերու մէջ են ընդհանրապէս այս յարաբերութիւնները:

Վ. Ճ. Ազգային Իշխանութեան հետ մեր յարաբերութիւնները գլխաւորաբար կը կեդրոնանան աշխատանքի համադրումի մէջ, եգիպտահայոց բժշկական, թոշակային եւ դաստիարակչական կարիքներուն հոգածութեան համար: Մենք գիրար կ'ամբողջացնենք հասնելու համար լաւագոյն ընկերային, ուսումնական եւ բժշկական միջոցներու հայթայթումին:

Նաեւ նիւթապէս կը սատարենք մասնագետներ կամ մարզիկներ Զայաստան ուղարկելու:

Գալով մեր յարաբերության ՀՀ դեսպանության հետ, - որ հաստատուած է ՀԲԸՄ Գահիրէի Չագըր կալուածին վրայ (2ամալէք), մեր յարաբերութիւնները լաւագոյն մակարդակի վրայ են, գործակցելով տարբեր մարզերու մէջ, ինչպէս Հայկական Ուսումնասիրութիւններու Կեդրոնի պարագային, որ կապուած է Գահիրէի Համալսարանին եւ ուր հայերէն լեզուի դասընթացքներ եւ զանազան դասախօսութիւններ ու համագումարներ տեղի կ'ունենան, ՀՀ դեսպանատան կազմակերպութեամբ:

Հարցում 2. - Գիտենք որ ՀԲԸՄ-ը լուրջ աշխատանք կը տանի հրատարակչական մարզէն ներս: Կրնա՞ք հակիրճ գաղափար մը տալ անցնող շրջանի նուաճումներուն եւ գալիքի ծրագիրներուն մասին:

Վ. Ճ. Բացի ՀԲԸՄ Գահիրէի մարդասիրական լայնածաւալ աշխատանքէն, մենք կարելորութիւն կու տանք նաեւ հրատարակչական աշխատանքին, տպագիր թէ համացանցային տարբերակներով: Այստեղ կրնանք յիշել.

1- Տպագիր գիրքեր

Գահիրէի ՀԲԸՄ-ի Սաթենիկ Չագըր Հիմնադրամի միջոցներով հրատարակուած են

83 գիրքեր եւ գրքոյկներ, որոնցմէ 64-ը հայերէն լեզուով, իսկ մնացեալները՝ հայկական նիւթեր շօշափող 19 անուն գիրք, այլ լեզուներով (արաբերէն եւ անգլերէն):

Այս ծիրին մէջ լոյս տեսած վերջին հրատարակութիւնն է ֆրանսահայ ծանօթ պատմաբան Րէյմոն Գեորգեանի «Le Genocide Armenien» հատորին արաբերէն թարգմանութիւնը:

2- Մամուլ (տպագիր եւ թուանշային)

Այս ենթախորագրին տակ ունինք ՀԲԸՄ Գահիրէի «Տեղեկատու»ն եւ արաբերէն «Արեգ» ամսագիրը. ունինք նաեւ երկու կայքէջեր, զորս նշեցինք արդէն:

3- Մամուլի թուանշային հաւաքածոներ

Եգիպտահայ երեք թերթերուն՝ «Արեւ»ի, «Յուսաբեր»ի եւ «Ջահակիր»ի (նոր շրջան) թուանշային հաւաքածոները, իրենց հիմնադրութենէն մինչեւ 2000 թուականը:

Ունինք նաեւ յատուկ կայքէջ մը արաբերէն մամուլի այն յօդուածներուն համար, որոնք անդրադարձած են Ջարդերուն, 1876-էն մինչեւ 1923 թուականները:

4- Երաժշտական եւ Նկարչական հրատարակչութիւն

5- «Պատմագրական» գործունեություն

Գահիրեի ՅԲԸՄ-ը կը հովանաւորէ եգիպտական համալսարաններէ շրջանաւարտ այն ուսանողները, որոնք իրենց բարձրագոյն ուսումը աւարտելէ յետոյ, հայկական թեմա մը կ'ընտրեն իրենց մագիստրական կամ դոկտորական թեզերը պաշտպանելու համար:

Հարցում Է. - Դուք ձեր տարիքով եւ փորձառութեամբ, կը կենաց երեց եւ նոր սերունդներուն միջեւ. երեց սերունդը ի՞նչ սպասելիքներ ունի նորերէն, եւ երիտասարդները որքանո՞վ պատրաստ են այդ սպասումները իրականացնելու. այս հարցին մէջ, Գահիրեի ՅԲԸՄ-ն ու անոր ատենապետը՝ դուք, ի՞նչ ծրագիրներ ունիք:

Վ. Ճ. Շատ կարեւոր է աշխատանք տանիլ, երիտասարդ սերունդը ընկերային գործունեութեան պատրաստելու համար: Իրենք են ապագայի մեր ղեկավարները: Գահիրեի ՅԲԸՄ մէջ մեծ կարեւորութիւն կու տանք այս հարցին եւ կարելիին չափ կը փորձենք վարչական մեր մեքենային մէջ, երեցներուն կողքին, երկու սեռէ երիտասարդներ եւս ներառել: Այս ընտրութիւնը կը կատարուի դանդաղօրէն, հաւասարկշռուած եւ ընտրովի կերպով: Անշուշտ անշրջանցելի է երեց սերունդը, իր ունեցած փորձառութեան եւ ՅԲԸՄ-ի հարցերուն գիտակցութեան համար. երիտասարդ սերունդը եւս անշրջանցելի կը համարենք, իր բերած նոր գաղափարներուն եւ տեսլականին համար: Դերը միջին սերունդին, որուն կը պատկանիմ նաեւ ես, այս երկու խմբաւորումներու աշխատանքն ու ծրագիրները համակարգել է, քայլ պահելու համար մեր նախնիներու սկզբունքներուն եւ հասնելու մեր Միութեան նպատակներուն: Այս բոլորը անշուշտ կը նպաստեն Միութեանս դրական եղափոխութեան եւ յառաջընթացին:

Այս օրերուս Միութիւնը կեդրոնացած է երիտասարդներու կազմաւորման, նոր ձեւեր եւ միջոցներ ներառելու ծրագիրներու իրագործումին եւ կառավարման մէջ. ծրագիրներ, ինչպիսիք են «Երիտասարդ Մասնագէտներ», «Կորիզ Առաջնորդներ», «Երաժշտական Հայաստան», «Հայաստանի Յայտնաբերում», «Կրթաթոշակներ», «Ֆոքըս», «Յաջորդ Սերունդ» եւ այլն, որոնք բոլորը նուիրուած են նոր սերունդի կազմաւորման:

Իւրաքանչիւր նախաձեռնութիւն կամ ձեռնարկ յաջողութիւն կը գտնէ միայն եթէ ներառէ տարիքային տարբեր խմբաւորումներէ տարբեր անհատականութիւններ, որոնք կրնան նոր եւ արդիական ծրագիրներ յղանալ եւ զանոնք գործադրել:

Հարցում Ը. - Վերջին ու կարելոր հարցում մը՝ այս տարի ՀԲԸՄ-ի հարիւր տասներորդ ամեակն է. սպասելի է որ մեծ շուքով նշուի այս իրադարձութիւնը: Ի՞նչ են ձեր ծրագիրները այս առնչութեամբ:

Մենք մեզ լարած ենք հարիւրտասներորդ ամեակը տօնելու համար, այս տարուան Նոյեմբեր ամսուն: Կարելոր նշանաքար մըն է ասիկա Միութեանս համար, որ հիմնուած է այս երկրին՝ Եգիպտոսի մէջ. պիտի տօնենք մեր Միութեան արժանի շուքով: Պիտի ներկայացուի մեր Միութեան պատմութիւնը լուսարձակային բաժինով մը, պիտի ըլլան բանախօսութիւններ, մշակութային ձեռնարկներ եւ անշուշտ վեթերաններու գնահատանք: Մանրամասնութիւնները ատենին պիտի յայտարարուին:

Շնորհակալութիւն:

*«Տեղեկագրու» թիւ 79, Ապրիլ 2016, էջ 6-11
Զրոյցը վարեց՝ Մ. Ե.*

ԶՐՈՅՑ ՏՈՔԹՈՐ ՎԻԳԷՆ ՃԻԶՄԷՃԵԱՆԻ ՀԵՏ

Կիրակի, 5 Ապրիլ 2009-ին, աշխարհի զբոսաշրջիկության մայրաքաղաք Լուքսոթի հեքիաթային “Լուքսոթ Տաճար”-ին մեջ տեղի ունեցած հմայիչ ներկայացումէ մը ետք, վիճակաձգութեամբ կազմուեցան 20 տարեկանէն վար ֆութպոլի համաշխարհային մրցաշարքին մասնակցող 24 երկիրներու խումբերուն վեց խմբաւորումները: Սոյն մրցաշարքը որ տեղի կ’ունենայ երկու տարին անգամ մը տարբեր երկրի մը մէջ, այս տարի 24 Սեպտեմբերէն մինչեւ 16 Հոկտեմբեր պիտի կայանայ Եգիպտոսի մէջ: Խմբաւորումները կազմուած են հետեւեալ ձեւով.- Ա. Եգիպտոս, Դրինիտատ-Թոպակօ, Բարակուէյ եւ Իտալիա: Բ. Նիճերիա, Վենեզուելա, Սպանիա եւ Դահիդի: Գ. Միացեալ Նահանգներ, Գերմանիա, Քամերուն եւ Հարաւային Քորէա: Դ. Կանա, Իւզպէքիստան, Անգլիա եւ Ուրուկուէյ: Ե. Պրազիլիա, Քոսթա Րիքա, Չեխիա եւ Աւստրալիա: Զ. Հունգարիա, Արաբական Միացեալ Էմիրութիւններ, Հարաւային Ափրիկէ եւ Հոնտուրաս:

Այս տեսակ համաշխարհային բնոյթի մրցաշարք մը կազմակերպելը կը կարօտի մասնագիտական մօտեցումի: Հակառակ որ ան FIFA-ի հսկողութեան ենթակայ է, սակայն կը գործադրուի հիւրընկալ երկրէն կազմուած յանձնախումբի մը կողմէ: Եւ ճիշդ այս պատճառաւ է, որ մրցաշարքին ծրագրման ընդհանուր տնօրէն ընտրուած է տոքթ. Վիգէն Ճիզմէճեան որ ՀԲԸՄ-ի Գահիրէի Մասնաճիւղի ատենապետն է: Տոքթ. Վիգէնը 1994-էն ի վեր FIFA-ի World Cup Organization-ի անդամ է եւ փորձառու կազմակերպիչ համաշխարհային եւ ցամաքամասային ֆութպոլի մրցաշարքերուն: 2006-ի Ափրիկէի ֆութպոլի բաժակի մրցաշարքին ընթացքին, որ տեղի ունեցաւ Եգիպտոսի մէջ, անոր բժախնդիր աշխատանքը մեծապէս սատարած է մրցաշարքին յաջողութեան: Իր ծայրայեղօրէն կազմակերպուած աշխատելաձեւին շնորհիւ FIFA-ին կողմէ ան նշանակուած էր քննիչ 2007-ին Գանատայի մէջ տեղի ունեցած ֆութպոլի պատանեկան համաշխարհային մրցաշարքին: Տոքթ. Վիգէն քաջատեղեակ է հայերէնի, արաբերէնի, անգլերէնի, ֆրանսերէնի եւ իտալերէնի: Զրոյցի մը ընթացքին ուզեցի աւելի մանրամասնութիւններ ունենալ թէ մրցաշարքին եւ թէ իրեն վստահուած դերին մասին:

“Իմ դերս որպէս ծրագրման ընդհանուր տնօրէն կը կայանայ

մրցաշարքին ամեն մեկ մանրամասնութեան մասին որոշումներ առնելու մէջ, թելադրութիւններ ընելու եւ թուղթի վրայ լուծումներ հայթայթելու մէջ: Օրինակի համար, այցելեցի տարբեր մրցադաշտեր (Stadium) ուր պիտի խաղցուին մրցումները եւ տեղեկագրեր գրեցի մրցադաշտերուն վիճակին մասին ներկայացնելով հարկ եղած նորոգումներն ու բարեփոխութիւնները” ըսաւ տոքթ. Վիգէն: “Մրցումները պիտի խաղցուին Գահիրէի, Աղեքսանդրիոյ, Պորկ-էլ-Արապի, Բորթ - Սաիտի, Իսմաիլիայի եւ Սուէզի մրցադաշտերուն մէջ, որոնք բոլորն ալ տարբեր տեսակի ու որակի նորոգութիւններու կը կարօտին” աւելցուց ան:

Ըստ տոքթ. Վիգէնի ամենամեծ դժուարութիւնը բարելաւումն է մարգագետիններուն, որոնք մեծածախս խնամքի կը կարօտին: Մրցադաշտի մը ձգած առաջին տպաւորութիւնը իր անթերի, լաւ խնամուած ու կանաչապատ խաղադաշտն է: Այս տեսակ համաշխարհային մրցաշարքեր, Եգիպտոսը աշխարհին առջեւ խոշորացոյցի տակ կը դնեն: Ուստի, բարձրորակ մրցադաշտեր անհրաժեշտ են լաւագոյնս ներկայացնելու մեր երկիրը: Վերանորոգման աշխատանքները չեն կրնար սկսիլ մինչեւ որ ֆութպոլի տեղական մրցումներու եղանակը աւարտի: Ժամանակ շահելու համար, առայժմ, մրցադաշտերուն շրջակայ բաժիններուն վրայ կ’աշխատին, մինչեւ որ կարենան հանդերձասենեակները, նստարաններն ու մարգագետինները նորոգել: “Մարտի վերջէն սկսեալ, ամեն ամիս, FIFA-ն յանձնախումբ մը պիտի ղրկէ, քննելու համար վերանորոգման աշխատանքները, տեղեկագիրներ պիտի գրուին եւ այսպէս գործերուն պիտի հետեւին ամիս առ ամիս, մինչեւ մրցաշարքին թուականը” ըսաւ ան:

Երբ հարց տուի թէ Գահիրէի արդէն իսկ խճողուած երթեւեկը ինչ ձեւ պիտի առնէ մրցաշարքերուն ընթացքին, ըսաւ որ մրցումները պիտի կայանան, 5 տարբեր քաղաքներու մէջ խճողումին առաջքը առնելու համար, սակայն անշուշտ ամենակարելոր մրցումները Գահիրէի մէջ տեղի պիտի ունենան, որոնց ընթացքին կ’ակնկալուի որ երթեւեկի ուստիկանութիւնը շատ կարելոր դեր ունենայ: Այս տարողութեամբ ու մակարդակով մրցաշարք մը կազմակերպելը կը կարօտի երկրին տարբեր նախարարութիւններուն ու մարմիններուն համագործակցութեան: Հաղորդակցութեան նախարարութիւնը պէտք է որ հեռախօսի ու անթել համացանցի (wireless internet)

կապեր տրամադրե մրցադաշտերուն, որպէսզի մրցումներուն հետեւող հազարաւոր լրագրողները կարենան վայրկեանը վայրկեանին աշխարհին փոխանցել արդիւնքները: Նաեւ ամէն մրցադաշտ պիտի օժտուի մամլոյ ասուլիսի սրահներով: Զբօսաշրջութեան նախարարութիւնը պէտք է որ մարզիկներուն, պատասխանատուներուն եւ հիւրերուն երկիր մուտքի արտօնութեան հետ առնչուող հարցերը լուծէ, ինչպէս նաեւ կեցութեան եւ փոխադրութեան միջոցներ տրամադրէ: Պաշտպանութեան նախարարութեան օժանդակութիւնը յոյժ կարեւոր է մրցադաշտերուն վերանորոգման աշխատանքներուն մէջ: Միայն այս նախարարութեան միջոցաւ է, որ որեւէ տեսակի արգելք կը հարթուի եւ աշխատանքները կ'ընթանան առանց յապաղումի, ըստ որոշեալ ժամանակացոյցին: Մարզական եւ երիտասարդական նախարարութեան պատասխանատուութիւնն է մարզիկներուն առօրեայ ծրագիրներուն գործադրութեան հետեւիլ: Եւ վերջապէս հիւրընկալ քաղաքներուն ոստիկանութեան ուսերուն կ'իյնայ կարգ կանոնը պահպանելը մրցադաշտերէն ներս եւ դուրս, նաեւ երթեւեկի սահուն հոսքը ապահովելը, մանաւանդ մրցումներէն ետք:

“Հազարի մօտ երկսեռ երիտասարդութիւն մը կամաւոր կերպով պիտի աշխատի մարզիկներուն ընկերակցելու պտոյտներու ընթացքին եւ ժողովուրդին ուղղութիւն տալու մրցադաշտերուն մէջ: Այս մեծ թիւով, գրեթէ անփորձ երիտասարդները պէտք է որ նախօրօք պատրաստուած ըլլան, որպէսզի ամէն ինչ սահուն ու անթերի ընթանայ” ըսաւ տոքթ. Վիգէն:

2006-ին կայացած Ափրիկէի ֆութպոլի մրցաշարքին ընթացքին հանդիսատեսները մեծ դժուարութիւն ունեցան իրենց տեղերը գտնելու, քանի որ նստարանները թուագրուած չէին: Այս տարի բոլոր մրցադաշտերուն նստարանները պիտի թուագրուին, վերջին վայրկեանին վէճերու կամ կռիւներու առաջքը առնելու համար: 2006-ի մրցաշարքին, մականիշով ոչ մէկ T-shirt, գլխարկ կամ գաւաթ պատրաստուած էր: Այս տարի FIFA-ն պիտի ստանձնէ այս տեսակ, շատ փնտռուած ապրանքներու պատրաստութիւնն ու վաճառքը: Տոմսերու վաճառքին ընթացքին սեւ շուկայի առիթ չտալու համար, Յուլիսէն սկսեալ FIFA-ն համացանցի միջոցաւ պիտի սկսի ծախել զանոնք, իսկ բուն տոմսերը շրջանառութեան պիտի դրուին մրցումէն ամիս մը առաջ:

“Բարեբախտաբար իմ պատասխանատուությունս կ’աւարտի, երբ ծրագիրները թուղթի վրայ մանրամասն կերպով ներկայացնեմ” ըսաւ տոքթ. Վիգէն, իր սովորական հանդարտ ու լաւատես մօտեցումով: “Անկէ ետք գործադիր տնօրէնն է, որ պիտի հսկէ որ արձանագրած նախագիծերս մանրակրկիտ կերպով գործադրուին” աւելցուց ան, վիթխարի պատասխանատուութիւն մը յաջող կերպով յանձնած անձի մը գոհունակ ժպիտով: Անշուշտ համաշխարհային պատանեկան ֆութպոլի մրցաշարքերը այնքան ժողովրդականութիւն չեն վայելեր որքան բուն համաշխարհային ֆութպոլի մրցաշարքերը, որոնք յաջորդ անգամ տեղի պիտի ունենան 2010-ին Հարաւային Ափրիկէի մէջ:

“Ճիշդ այս պատճառաւ FIFA-ն կը նախընտրէ որ մրցումները տեղի ունենան փոքր 20-30 հազար հոգինոց մրցադաշտերու մէջ, որպէսզի պարապ նստարաններ չըլլան” ըսաւ տոքթ. Վիգէն:

Այսպէս, մրցաշարքին բացման մրցումը Եգիպտոսի եւ Դրինիտատ-Թոպակոյի միջեւ պիտի կայանայ Ադէքսանդրիոյ Պորկ-Էլ-Արապի մրցադաշտին մէջ: Ապա սկզբնական մրցումները պիտի կայանան Բորթ- Սայիտի, Իսմաիլիայի եւ Սուէզի մէջ ու հետզհետէ երբ աւարտականներուն մօտենան՝ Պորկ-Էլ-Արապի եւ Գահիրէի մրցադաշտերուն վրայ: Օգոստոսին Եգիպտոսի բոլոր քաղաքներուն մէջ մրցաշարքը գովազդող թղթիկներ ու պաստառներ պիտի հրապարակուին: Մրցաշարքին հովանաւոր ընտրուած են ADIDAS-ը, SONY-ն, HYUNDAI-ը եւ TOSHIBA- ն: Կը մաղթենք որ մրցաշարքը ընթանայ նոյնքան յաջող որքան տոքթ. Վիգէն Ճիզմէճեանը ծրագրած է զայն: Իսկ եգիպտական խումբին կը մաղթենք որ տիրանայ մրցաշարքի բաժակին:

*Սօսի Ներքդեան-Յակոբեան
“Տեղեկապու” թիւ 51, Ապրիլ 2009, էջ 4-5*



Գահիրեի սկաուտական Ա. կազմ, պատասխանատուներ՝
ձախին՝ Շ. Կարիպեան, աջին՝ Վ. Ճիզմեհեան, 1986.



Սկաուտներ և պատասխանատուներ ՀԲԸՄԻ նախագահուհի տիկ. Լուիզ
Մանուկեան-Սիմոնի հետ, 1988.



ՀԵԸՄ-ՆՈՒՊԱՐԻ պասքեթ-
պոլի կրտսերներու խումբը,
Հալեպ, 2005.



Նախագահ Հ. Մուկարաբի, նախարարներու և ՖԻՖԱյի
պատասխանատուներու հետ, 2006.



World Cup 1998, St. Etienne, France.

ԿԵՆՍԱԳՐԱԿԱՆ ԳԻԾԵՐ

Անձնական տուեալներ

Ծննդեան թուական	18 Սեպտեմբեր 1961
Հպատակություն	Եգիպտական, հայկական
Ընկերային կարգավիճակ	ամուսնացած, երկու դուստրերու հայր
Ասպարեզ	վիրաբույժ-ատամնաբույժ
Ուսում	
Նախակրթարան	1967-1973 Նուպարեան Ազգ.Վրժ.
Երկրորդական	1973-1979 Յիսուսեան (Jesuites)
Համալսարան	1979-1984 Գահիրեի ատամնաբուժական համալսարան

Լեզուներ

Հայերեն, ֆրանսերեն, արաբերեն, անգլերեն եւ իտալերեն:

Ասպարեզ, իրագործումներ

- 1984-Էն մինչեւ օրս՝ ատամնաբուժական անձնական դարմանատուն.
- 1988-2003 հաղորդակցութեանց տնօրէն եւ պաշտօնական բանբեր Ֆութպոլի Ափրիկեան Ֆետերասիոնին.
- 1994-2006 անդամ FIFA-ի աշխարհի ֆութպոլի մրցումները կազմակերպող յանձնախումբին.
- Եղած է տեղեկատուութեանց պատասխանատու ֆութպոլի աշխարհի ախոյեանութեան մրցումներուն.
- 2006 պաշտօնական լրատու եւ ծրագրումի տնօրէն ափրիկեան ֆութպոլի ախոյեանութեան, Եգիպտոս.
- 1998-2002 անդամ FIFA-ի լրատուութեան յանձնախումբին.
- 2004-2007 անդամ Եգիպտոսի ֆութպոլի միութեան գործադիր յանձնաժողովի.
- 2007 FIFA-ի լրատուութեան պատասխանատու աշխարհի ախոյեանութեան մրցաշարքին, Գանատա.
- 2007-2010 FIFA-ի լրատուութեան պատասխանատու եւ պատուիրակ ֆութպոլի միջազգային մրցումներուն.
- 2009ծրագրումի տնօրէն FIFA-ի աշխարհի ախոյեանութեան երիտասարդաց մրցումներուն, Եգիպտոս.

Գործունեութիւն Եգիպտահայ համայնքէն ներս

- 1983-1992 անդամ Գահիրեի ՀԲԸՄ-ի «Կռունկ» երգչախումբին.
- 1984-1986 օժանդակ անդամ Գահիրեի ՀՄԸՄ-ՆՈՒՊԱՐԻ վարչութեան.
- 1984-1992 խմբապետ ՀՄԸՄ-ՆՈՒՊԱՐԻ սկաուտական շարժումին.
- 1984-1992 անդամ, ապա ատենապետ Գահիրեի ՀՄԸՄ-ՆՈՒՊԱՐԻ երիտասարդաց յանձնախումբին.
- 1986-2006 անդամ Գահիրեի Սուրբ Գրիգոր Լուսաւորիչ եկեղեցւոյ հոգաբարձութեան.
- 1986-2012 վարչութեան անդամ Գահիրեի ՀՄԸՄ-ՆՈՒՊԱՐ մարզական ակումբի.
- 2011-2015 անդամ Գահիրեի Թեմական ժողովի.
- 1996-2006 օժանդակ անդամ Գահիրեի ՀԲԸՄ-ի վարչութեան
- 2006-Էն խմբագիր Եգիպտոսի ՀԲԸՄ-ի կայքէջին.
- 2006-2014 անդամ ՀԲԸՄ-ի Եգիպտոսի Շրջանակային Յանձնաժողովին, 2014-Էն սկսեալ փոխ-ատենապետ.
- 2006-Էն մինչեւ օրս՝ ատենապետ ՀԲԸՄ-ի Գահիրեի մասնաժողովին

